

四庫全書

集部

欽定四庫全書

集部
宋元詩會卷二十三

詳校官中書_臣陸 湘

主事銜_臣徐以坤復勘

總校官知縣_臣繆 琪

校對官中書_臣溫汝适

謄錄監生_臣蕭 華

欽定四庫全書

宋元詩會卷二十一

兵部主事陳焯編

蘇轍

字子由年十九與兄軾同登進士科又同策制舉轍極言得失於禁廷之事尤為切至考官胡宿以為不逮請黜之仁宗曰以直言召人而以直棄之天下其謂我何宰相不得已寘之下等授商州軍事推官改大名推官神宗立轍上書言事召對延和殿王安石出青苗書使轍熟議曰有不便以告勿疑轍開陳婉切安石頗頷之自此逾月不言青苗會河北轉運判官王廣惠迎合安石意奏請本

錢私試其法於陝西自是青苗遂行不復能止轍
移書安石力爭之大忤其意賴陳升之解救得為
河南推官歷教授陳州掌齊州書記簽判南京坐
兄軾以詩得罪謫監筠州酒稅移知績溪縣哲宗
立以祕書省校書郎召擢右司諫力排邪正並用
之說屏去王人遷中舍進戶部侍郎代兄軾為翰
林學士權吏部尚書使朔方還為御史中丞拜尚
書右丞進門下侍郎紹聖初李清臣等進用復言
熙豐事激怒哲宗落職知汝州再責知袁州未至
降少府監住筠州三年責化州別駕安置雷州移
循州徽宗即位徙永州岳州復大中大夫提舉鳳
翔太平宮罷祠居許州再復大中大夫致仕政和
二年卒年七十四追復
端平殿學士謚文定

張恕寺丞益齋

人生不讀書空洞一無有羨君常齋居散帙滿前後開
編試尋繹閱歲行自富從橫畫圖出次第宮商奏汪洋
畜江河渺莽包林藪興亡數千歲絡繹皆在口顧念今
所知頗覺前日陋我家亦多書早歲嘗竊叩晨耕掛牛
角夜燭借隣牖經年謝賓客饑坐失昏晝堆胸稍蟠屈
落筆逢左右樂如聽鈞天醉劇飲醇酎自從厭蓬華誤
逐功名誘初心一漂蕩舊學皆榛莠失足難遽回撫卷
長自詬幸君無事年謂可終身守春耕不厭深秋穫當

自受金玉或為災詩書豈相負

過九華山

南遷私自喜看盡江南山孤舟少僮僕此志還復難局
促守破牕聯翩過重巒忽驚九華峯高拱立我前蕭然
九仙人縹緲凌雲烟碧霞為衣裳首冠青琅玕揮手謝
世人可望不可攀我行竟草草安能拍其肩但聞有高
士卧聽松風眠松根得茯苓壯若干歲龜煮食一朝盡
終身棄腥羶腹背生綠毛輕舉如翔鸞相逢欲借問已

在長松端

同孔常父作張夫人詩

女子勿言弱男兒何必強君看張夫人身舉十五喪頭
上脫笄珥篋中斥襦裳築墳連丘山松柏鬱蒼蒼親戚
不為助涕泣感道傍昔有王氏老身為尚書郎親死棄
不葬簪裾日翱翔白骨委廬陵宦遊在岐陽一旦有丈
夫軒軒類佯狂相面識心腹開口言灾祥嗟汝平生事
不了令誰當汝身暖絲綿汝口甘稻粱衣食未嘗廢此

事乃可忘一言中肝心投身拜其牀傍人漫不知相視
空茫茫終言汝不悛物理久必償兒女病手足相隨就
淪亡鄙夫本愚悍過耳風吹牆明年及前期長子憂髡
瘍一麾守巴峽雙柩還故鄉弱息雖僅存蹣跚亦非良
誰言天地寬網目固自張古事遠不信近事世所詳企
張非求福禍敗當懲王

桐軒

桐身青琅玕桐葉蒲葵扇落落出軒墀亭亭奉間燕夜

聲疎雨滴午影微風轉秋飈一凌亂
浙瀝驚蔥蒨朝日失繁陰青苔覆遺片
空使坐中人慨然嗟物變

和子瞻記夢

兄從南山來夢我南山下探懷出詩卷
卷卷盈君把詩詞古人似弟則吾弟也
相與千里隔安得千里馬攜手上南山
不知今乃夜晨雞隔牆唱敲枕牕月亞
百語記一詞秋菊悲蛩吒此語鮑謝流
平日我不暇我本無此詩嗟此誰所借

舟中聽琴

江流浩浩羣動息琴聲琅琅中夜鳴水深天濶音響遠
仰視牛斗皆縱橫昔有至人愛奇曲學之三歲終無成
一朝隨師過滄海畱置絕島不復迎終年見怪心自感
海水震掉魚龍驚翻回蕩滴有遺韻琴意忽忽從此生
師來迎笑問所得撫手無言心已明世人囂囂好絲竹
撞鐘擊鼓浪謂榮安知江琴韻超絕擺耳大笑不肯聽

巫山廟

山中廟堂古神女楚巫婆娑奏歌舞空山日落悲風吹
舉手睢盱道神語神仙潔清非世人瓦盎傾醪薦麋脯
子知神君竟何自西方真人古王母飄然乘風遊九州
謁渡西海薄中土白雲為車駕蒼虬驂乘湘君宓妃御
天孫織綃素非素衣裳飄飄薄烟霧泊然沖虛渺無營
朝餐屑玉嚙瓊乳下視人世安可據超江乘山去無所
巫山之下江流清偶然愛之不能去湍崖激作相喧飀
白花翻翻龍正怒堯使大禹導九州石隕山隊幾折股

山前恐懼久無措稽首山下苦求助丹書玉笈世莫窺
指示文字相爾汝擘山洩江幸無苦庚辰虞余實相禹
功成事定世莫知空山俄頃千萬古

遊城西集慶園

送客城西客已遠歸路北池接南苑冰漸片斷水光浮
柳線和柔風力軟繚牆朱戶誰家園流水平畦春日淺
禁河分溜一池足洛圃移花百金賤飛甍斤斧聲未絕
翠栢栽培影初遍傍人笑指高臺處前年適見荒榛滿金

錢力奪天地功歲月未多風物換人生富貴無不成都
門坐置山林觀暖風遲日時一到早出莫歸應未晚主
人最貴稀出城長使憧憧路人看

司馬君實端明獨樂園

子嗟丘中親藝麻邵平東陵親種瓜公今東去事農圃
亦種洛陽千本花脩篁遶屋韻寒玉平泉入畦紆卧蛇
錦屏奇種斲巖竇嵩高靈藥移萌芽城中三月花事起
肩輿遍入公侯家淺紅深紫相媚好重樓多葉爭矜誇

一枝盈尺不論價十千斗酒那須賒歸來曳履苔逕滑
醉倒閉門春日斜

王詵都尉寶繪堂詞

侯家玉食繡羅裳彈絲吹竹喧洞房哀歌妙舞奉清觴
白日一醉萬事忘百年將種存慨慷西取庸蜀踐戎場
戰袍賜錦盤鵬章寶刀玉玦餘風霜功臣子孫白哲長
朱門甲第臨康莊生長介冑羞膏粱四方賓客坐華堂
何用為樂非笙簧錦囊犀軸堆象牀竿叉連幅翻雲光

手披橫素風飛揚長林巨石挿雕梁清江白浪吹粉牆

異花沒骨朝露香

徐熙畫花落筆縱橫其子變格以五色染就不見筆迹謂之沒骨 鷺

禽猛獸古鬻張騰踏騾囊聯驢噴振風雨馳平岡前
數顧陸後吳王老成雖喪存典常坐客不識視茫洋卷
舒終日未用忙遊意淡泊心清涼

中秋見月寄子瞻

西風吹暑天益高明月耿耿分秋毫彭城閉門青嶂合
卧聽百步鳴飛濤使君攜客登燕子月色著人冷如水

延前不設鼓與鐘處處笛聲相應起浮雲卷盡流金丸
戲馬臺西山鬱蟠杯中渌酒一時盡衣上白露三更寒

湖陰曲

老虎穴中卧獵夫不敢窺驂騑服箱驂盜驪巡城三匝
漫不知帳中晝夢日繞壁驚起知是黃鬚兒馬鞭七寶
留道左猛士徘徊不能過遺矢蜚空去已遙明日神兵
下赤霄荒城至今人不住狐兔驚走風蕭蕭

贈方子明道人

水銀成銀利十倍丹砂為金世無對此人
靳術不肯傳閩戶泥牆畏天戒今子何為
與我言人生貧富寧非天鉗鎚橐籥枉心
力蘊鹽布被隨因緣我來江西晚聳道
一言契我心所好廓然正若大虛空平生
伎倆都除掃子言舊事淨慈師未斷有為
非淨慈此術要將救饑耳人人有命何憂
饑

大秦寺

大秦遙可說高處見秦川草木埋深谷
牛羊散晚田山

平堪種麥僧魯不求禪北望長安市高城遠似烟

和北都偶成

二首

天寶亂已定河壩兵更多故城埋白骨遺俗喜長戈卧
獸常思肉奔鯨不受羅縱橫竟安在唯見冢嵯峨

禁禦封金殿清河貫石門時平餘古木兵散有空屯形
勝山園濶蕃宣海內尊川原不論頃雲夢可勝吞

將出洛城過廣愛寺

二首

寺古依喬木僧閒正暮年為生何寂寞愛客尚留連虛

牖羅脩竹空厨響細泉坐聽談舊事遍識洛中賢
虛室無尋丈青山有百層迴峯看不足危石恐將崩聽
法來天女依巖老梵僧須彌傳納芥觀此信還曾

送董揚休比部知真州

奏課西南最分符江海衝往來觀惠術蟠錯試餘鋒文
字從堆案罇壘強解容金山只隔水時復聽晨鐘

寒食遊南湖

二首

遶郭春水滿被堤新柳黃官池無禁約野艇得飛揚浪

泛歌聲遠花浮酒氣香晚風歸櫂急細雨溼紅粧
攜手臨池路時逢賣酒壚柳斜低繫纜草偃綠侵壺波
蕩春心起風吹酒力無冠裳強包裹半醉遣誰扶

覽輝亭

城裏最高處坡陀見一城山多來有緒江遠靜無聲歌
吹風前度樓臺雨後明風光同楚蜀聊此慰平生

庾樓

元規多逸興上客有殷生夜半酒將罷公來坐不驚舞

翻江月迎談落塵毛輕塵世風流盡高樓空此名

題方子明道人東牕

閉門何所事毛髮日青青齒折登山屐塵生貫酒瓶調
心開貝葉救病讀僊經定起無人見寒燈一點星

留滯高安四年有餘忽得信聳當除官真揚間偶
成小詩書于屋壁

數間茅屋久蹉跎四見秋風入薜蘿北櫂偶然追雁羽
南公誰復伴漁蓑三年賈傳驚吾老九歲劉郎愧爾多

此去仍家江海上不妨一葉弄清波

送張恕朝奉南京簽判

楚蟹吳柑初著霜梁園官酒試羔羊
老如計相非無齒清似留侯未却糧
杖履稍通賓客過轂蔬要遣子孫嘗
詔書委曲如公意幕府新除朱紱郎

石鼻城

千山欲盡垂為鼻百戰皆空但有城
虎闖穴中秦地恐龍飛渭上漢江傾
雍人未有章邯怨魏將猶存仲達情

睥睨陵遲春草滿白羊無數向風鳴

樓觀

老聃厭世入流沙飄蕩如雲不可遮弟子憐師將去國

關門望氣載還家高臺尚有傳經處畫壁空留駕犢車

一授遺書無復老不知何苦服胡麻

此觀尹喜舊宅神仙傳言尹喜於流

沙之西服

巨勝實

木山引水

引水穿牆接竹梢谷藏峰底大容瓢將流旋滴廬山瀑

已盡還來海上潮
亂點落池驚睡覺
半山含潤沃心焦
瓦盆一斛何勝滿
溢去猶能浸菊苗

强君瓦亭

君為魏博三年客
日有江湖萬里心
暫得野亭畱馬足
强修疎柳步堤陰
無人攜手共吳語
得意搖頭時越吟
何日東郊過微雨
竝騎鞍馬去同尋

傳欽之學士濟源草堂

聞有高居直百金
西山南麓北山陰
園通濟水池塘好

花近洛川顏色深人去節旄分重鎮客來猿鶴感幽吟

溪溪雨過西湖漲歸興蕭然定不任

欽之時
在許州

次韻子瞻雨中督役夜宿水陸寺

雲氣連山雨瀉盆莫投僧舍欲關門暫時灑掃寬行役
終夕崎嶇入夢魂煩熱暗消秋簟冷烝濡未解夜燈昏
二年遊宦多勞苦何日相從得細論

次韻有美堂歸夜

飲闌鐘虞欲移軒香霧猶殘金博山明月飛來松嶺外

遊人散落馬蹄間
城巖畫鼓初傳角
路暗山花自落鬟
清境暫時都不見
夜深人盡始來還

環波亭

南山迤邐入南塘
北渚岩堯枕北牆
過盡綠荷橋斷處
忽逢朱檻水中央
鳬鷺聚散湖光淨
魚鰲浮沈花影涼
清境不知三伏熱
病身唯要一藤牀

送青州簽判俞退翁致仕還湖州

不作清時言事官
海邦邨復久盤桓
早依蓮社塵緣少

新就草堂歸計安富貴暫時朝露過江山故國水精寒
宦遊從此知多事收取楞伽靜處看

徐正權秀才城西溪亭

竹林分徑水通渠真與幽人作隱居溪上路窮惟畫舫
城中客至有罾魚東來只為林泉好野外從教簿領疎
不識徂徠石夫子兼因女壻覓遺書

徐生石介女壻也

玉盤盂

東蘇武舊公家園中千葉白芍藥子膽新為此名

千葉團團一尺餘揚州絕品舊應無賞傳
莒國遷鍾虞

移憶胡僧置鉢盂叢底留連傾鑿落餅中捧擁照浮屠
強將絳蠟封紅萼憔悴無言損玉膚

李公擇以慧泉答章子厚新茶

無錫銅瓶手自持新芽顧渚近相思故人贈答無千里
好事安排巧一時蟹眼煎成聲未老兔毛傾看色尤宜

槍旗攜到齊西境更試城南金線奇

金線泉在齊州城南

聿王輦還京會客劇飲戲贈

聞君歸去便招呼笑語不知清夜徂結束佳人試銀甲

留連狂客惱金吾
燭花零落玉山倒
詩筆敲斜翠袖扶
暫醉何年依錦瑟
東齋還復卧氍毹

次韻張恕春暮

祇言城市無佳處
亦有南湖幾度遊
好雨晴時三月盡
啼鴛到後百花休
老猿好飲常連臂
野馬依人自絡頭
不肯低徊池上醉
試看生滅水中漚

送張耒赴壽安尉

魏紅深淺配姚黃
洛水家家自作塘
遊客賈生多感慨

閒官白傅足篇章山分少室烟雲老宮廢連昌草木長
路出嵩高應少駐孱顏新過一番霜

九曲池

秘老清彈怨廣陵隋家水調繼哀音可憐九曲遺聲盡
惟有一池春水深鳳闕蕭條荒草外龍舟想像綠楊陰
都人似有興亡恨每到殘春一度尋

簡寂觀

山行但覺鳥聲殊漸近神仙簡寂居門外長溪淨客足

山腰苦筍助盤蔬
喬松定有藏丹處
大石仍存拜斗餘
弟子蒼髯年八十
養生世世受遺書

萬杉寺

萬木青杉一手栽
滿堂白佛九天來

仁宗初年有僧手種萬杉特為建此

寺仍以禁中佛賜之

涓涓石溜供厨足
矗矗山屏遶寺開
半榻松

陰秋簟冷一杯香
飯午鐘催安眠飽
食平生事不待山
僧喚始來

白鶴觀

五老相攜欲上天玄猿白鶴盡疑仙浮雲有意藏山頂
流水無聲入稻田古木微風時起籟諸峰落日盡生烟
歸鞍草草還城市慙愧幽人正醉眠

次韻毛君病中菊未開

病肺秋深霧雨傷舊繒故絮喜清涼菊花金粟未曾吐
桂酒鵝兒空自黃草木未知年有閨風霜漸近月方陽
得詩聞示維摩疾欲到毘耶言已忘

答溫守李鈞見寄

梁苑相從簿領中，清風相逐畫船東。
婆婆江海凌雲鶴，飲啄籠樊失渚鴻。
別後丹砂迷舊訣，愁來白髮變衰翁。
此間詩老仍勍敵，正憶高吟酒盞空。

放膀後毛守見招

飽食安眠愧不材，疎簾翠帟幸相陪。
深居正厭銀袍亂，失喜初聞鐵鎖開。
佳句徑蒙探古錦，小槽仍報滴新醅。
諸人欲見風流伯，不用招呼亦自來。

雨後遊大愚

風光四月尚春餘淫雨初乾積潦除古寺蕭條仍負郭
閒官疎散亦肩輿摘茶戶外蒸黃葉掘筍林中間綠蔬
一飽人生真易足試管茅屋傍僧居

曾子固舍人挽詞

少年漂泊馬光祿末路騫騰朱會稽儒術遠追齊稷下
文詞近比漢京西平生碑版無容繼此日銘詩誰為題
試數廬陵門下士十年零落曉星低

和張安道讀杜集

我公才不世晚歲道尤高與物都無著看書未覺勞微
言精老易奇韻喜莊騷杜叟詩篇在唐人氣力豪近時
無沈宋前輩蔑劉曹天驥精神穩層臺結構牢龍騰非
有迹鯨轉自生濤白也空無敵微之豈少褒論文開錦
繡賦命委蓬蒿初試中書日旋成廊時逃妻孥隔豺虎
關輔暗旌旄入蜀營三徑浮江寄一艘投人慙下舍愛
酒類東臯漂泊終浮梗迂疎獨釣鰲誤身空有賦拚脛
惜無袍卷軸今何益零丁昔未遭相如元並世惠子謾

臨濠得失將誰怨憑公付濁醪

遺老齋

久無叩門聲咏咏問何故田中有人至昨夜盈尺雨
大言里中舊獨有陳太丘文若命世人惜哉憂人憂

洛陽試院樓上新晴

二首

嵩少猶藏薄霧中前山迤邐夕陽紅高樓一閉三千日
遙憶巖頭種藥翁

伊闕遙臨鳳闕前龍門女兒氣蒼然唐朝御路依稀在

猶想東巡塵暗天

逍遙堂會宿二首

并引

轍幼從子瞻讀書未嘗一日相舍既壯將遊宦四方讀
韋蘇州詩至安知風雨夜復此對牀眠惻然感之乃
相約早退為閒居之樂故子瞻始為鳳翔幕府畱詩
為別曰夜雨何時聽蕭瑟其後子瞻通守餘杭復移
守膠西而轍滯留于淮陽濟南不見者七年熙寧十
年二月始復會于澶濮之間相從來徐留百餘日時

宿于逍遙堂追感前約為二小詩記之

逍遙堂後千尋木長送中宵風雨聲
誤喜對牀尋舊約不知漂泊在彭城

秋來東閣涼如水客去山公醉似泥
困卧北牕呼不起風吹松竹雨淒淒

戲贈李朝散

江霧霏霏作雪天樽前醉倒不知寒
後園桃李春猶晚試覓酥花仔細看

代答

銀瓶瀉酒正霜天
玉麈生風夜更寒
下客不辭投轄飲
好花猶恐隔簾看

以蜜酒送柳真公

牀頭釀酒一年餘
氣味全非卓氏壚
送與幽人試嘗看
不應知是百花鬚

乾荔支

含露迎風惜不嘗
故將赤日損容光
紅消白瘦香猶在

想見當年十八娘

米芾

字元章吳人以母侍宣仁后謫邨舊恩補臨光尉
歷知雍丘縣連水無為軍召為書畫學博士賜對
便殿上其子友仁所作楚山清曉圖推禮部員外
郎卒年四十九芾妙于翰墨尤工臨移至亂真不
可辨其性癖異多有足傳笑者以此從仕數困嘗
奉詔募晉人小楷得入宣和殿觀禁內之所藏人
以為寵子友仁兵部侍郎敷文閣直學士

秋登峴山之作

皎皎中天月團團徑千里震澤乃一水所占已過二娉

羅即峴山謬云形大地地惟東吳偏山水古佳麗中有
皎皎人瑤衣玉為珥位推列仙長學與千年對幽操久
獨處迢迢願招類金飈帶秋威歛逐雲檣至朝隔輿馭
飈暮過光浮袂雲育有風驅蟾餐有刀利亭亭太陰宮
無乃瞻星氣興深夷險一理洞軒裳偽紛紛夸俗勞坦
坦忘懷易浩浩將我行蠢蠢須公起

題多景樓

欲雨氣不透庭梧有棲烟回首望北固雲藏淨名天呼

童速具興憑高覽山川隱見豈不好開霽景固全須與
江風流湛湛清露圓歸途知有伴華月上丹淵

寄紹彭

蕭李騷子弟不收慰問帖妙迹固通神水火土更劫所
存慰問者班班在箱笈使惡乃神護不然無寸札自此
輒畫相後人眼徒攝

送王渙之彥舟

集英春殿鳴捐歇神武天臨光下徹鴻臚初唱第一聲白

面王郎年十八神武樂育天下造不使敲枰使傳道衣
錦東南第一州棘壁湖山兩清照襄陽野老漁竿客不
愛紛華愛泉石相逢不約無逆輿握古圖書同岸憤淫
朋嬖黨初相慕濯髮洗心求易慮翩翩遼鶴雲中侶土
苴尪鳩那一顧邇來艱業何深至湛湛具區無底汔可
憐一點終不易枉駕殷勤尋漫士漫士平生四方走多
與羣才並肩肘少有俳辭能罵鬼老學鳩夷但存口一
官聊具三徑資取捨殊途莫回首

題蘇之孟家薛稷二鶴

遼海未須顧螻蟻
仰霄孤唳留清耳
從容雅步在庭除
浩蕩閒心存萬里
乘軒未失入佳談
寫真不妄傳詩史
好事心靈自不凡
臭穢功名皆一戲
武功中令應天人
束髮寮陽侍帝宸
連城照乘詎惜寶
皇圖禮誥誰珍真
百齡生我欲公起
九原蕭蕭松嶷嶷
得公遺物非不多
賞物懷賢心未已

雜詠

揚清歌發皓齒北方佳人東鄰子且吟白紵停淥水長
袖拂面為君起寒雲夜卷霜海空朔風吹天飄塞鴻玉
顏滿堂樂未終館娃日落歌吹濃絃歌興罷拂衣還棄
米何嘗有俸錢恩自大釣能逐物只應訪藥是優賢

余嘗硯越竹光滑如金版在油拳上短截作闕軸

入笈番覆一日數十張學書作詩寄劉薛

越筠萬杵如金版安用杭油與池繭高壓巴郡烏絲欄
平欺澤國清華練老無他物適心目天使殘年同筆硯

圖書滿室翰墨香劉薛何時眼中見

貞孃墓歌

何不學仙冢累累白楊西郭陰風悲虎丘一叩貞孃墓
薜荔援牆委蘭露千歲蒙茸幾樹花夜飄鬼火曉啼鴉
向憐挾瑟彈清月猶憶吹簫乘彩霞吳閭少年往來道
黛蛾釵燕誰能好酒滴春雲夢不消泉聲幽咽鐘聲老
陌上行遊緩緩歸昨日紅顏今日非東望闔閭穿葬處
玉鳧欲化湛盧飛

寄薛郎中紹彭

二首

老來書興獨未忘，頗得薛老同徜徉。天下有識誰鑒定，
龍宮無術療膏肓。淮風吹戟稀訟牒，典客閉閣閒壺漿。
吟樹對山風景聚，墨池濯硯龜魚藏。珠臺寶氣每貫日，
月觀桂實時飄香。銀淮燭天限織女，烟海括地生靈光。
僞兒乃是翰墨侶，挾竹不使輿衛將。象管鈿軸映瑞錦，
玉麟斐几鋪雲肪。依依煙革動勃鬱，矯矯龍蛇起混茫。
持此以為風月伴，四時之樂渠未央。部刺不糾翰墨病，

聖恩養在林泉鄉風沙漲天烏帽客胡不東來從此荒
歐怪褚妍不自持猶能半蹈古人規公權醜怪惡札祖
從茲古法蕩無遺張顛與柳頗同罪鼓吹俗子起亂離
懷素獼獠小解事僅趨平淡如盲醫可憐智永硯空白
去本一步呈千端已矣此生為此困有口能談手不隨
誰云存心乃筆到天工自是秘精微二王之前有高古
有志欲購亡高貲殷勤分貽薛紹彭散金購取重跋題

揚州

東風何索寞帶雪入揚州尚想遺釵雀重觀上玉鉤真
同一夢覺空憶十年遊邂逅逢孫楚酣歌慰滯留

將之苕溪戲作呈諸友

松竹畱因夏溪山去為秋久賔白雪詠更度采菱謳縷
玉鱸堆案團金橘滿洲水宮無限景載與謝公遊

復借書劉李周三姓

二首

好懶難辭友知窮宜念通貧非理生拙病覺養心功小
園能畱客青冥不厭鴻秋帆尋賀老載酒過江東

旅食緣交駐浮家為興來
句留荆水話禁向卞峯開
過刻如尋戴遊梁定賦枚
漁歌堪畫處又有魯公陪

潤州甘露寺

邑故重重構春歸戶戶嵐
槎浮龍委骨畫失獸遺眈
神護衛公塔天留米老庵
栢梁終厭勝會副越人譚

甘露寺晚眺

六代蕭蕭木葉稀樓高北
固落殘暉兩州城郭青烟
起千里江山白鷺飛海近
雲濤驚夜夢天低月露溼
秋衣

使君肯負時平樂長倒金鍾盡醉歸

觀音巖

秦驅禹鑿已寥寥却為高人得姓焦
鮑餌有時邀楚釣海雲常覺護山樵
巖多陰霧龍藏角蛙絳蒼林玉露臙
濁氣不侵靈貺下方壇曾駐紫清遊風

山光寺

竹園山徑晚風清又入山光寺裏行
一一過僧談舊事遲遲繞屋認題名
仙來石畔懷灰劫鶴語池邊勸後生

三十年間成底事空叨薄祿是浮榮

望江樓

雲間鐵甕近青天縹緲飛樓百尺連三峽江聲流筆底
六朝帆影落尊前幾番畫角催紅日無事滄洲起白烟
忽憶賞心何處是春風秋月兩茫然

詠潮

怒氣號聲送海門州人傳是子胥魂天排雲陣千家吼
地擁銀山萬馬奔勢與月輪齊朔望信如壺漏報晨昏

吳亡越霸成何事一唱漁歌過遠村

濮王宗漢作蘆雁有佳思贈以詩

二首

偃蹇汀眠鴈蕭梢風觸蘆京塵方滿眼速為喚花奴
埜趣分苔水風光剪雪湖塵中不作惡為有鄴公圖

垂虹亭

斷雲一葉洞庭帆玉破鱸魚金破柑好作新詩寄桑亭
垂虹秋色滿東南

中秋登望海樓

目窮淮海滿如銀萬道虹光育蚌珍天上若無修月戶
桂枝撐損向西輪

郭祥正

字功甫當塗人少有詩名梅堯臣極賞之以為太
白後身舉進士第知武岡縣奏乞神宗專用王安
石安石恥為小臣所薦反詆之遂以殿中丞
致仕復出知端州棄去隱于邑之青山卒

蓮根有長絲

蓮根有長絲不供貧女織柳梢有飛綿不暖寒者衣朝
歌悠悠暮歌短下地沈沈上天遠東生白日還西流志

士長懷萬古愁

金山行

金山杳在滄溟中
雪崖冰柱浮仙宮
乾坤扶持自今古
日月髣髴躔西東
我泛靈槎出塵世
搜索異境窺神工
一朝登臨重太息
四時想像何其雄
卷簾夜閣掛北斗
大鯨駕浪吹長空
舟摧崖斷豈足數
往往霹靂鏹蛟龍
寒蟾八月蕩瑤海
秋光上下磨青銅
鳥飛不盡暮天碧
漁歌忽斷蘆花風
蓬萊久聞未成往
壯觀絕致遙應同

潮生潮落夜還曉物與數會誰能窮百年形影浪自苦
便欲此地安微躬白雲南來入我望又起歸興隨征鴻

墨染絲

綠絲自喜如霜白輸入官家吏嫌黑手持退印競傳呼
倏見長絲染深墨墨絲歸織家人衣別買輸官吏嗔遲
寄言敵國與三軍汝得豐衣民苦辛

禾山

英英玉草禾乃是鳳凰食鳳凰殊未來禾生亦何益

西村

遠近皆僧刹西村八九家得魚無賣處沽酒入蘆花

訪隱者

一徑沿厓踏蒼壁半塢寒雲抱泉石山翁酒熟不出門
殘花滿地無人跡

端峽

雙峽天開控江水水自牂牁來萬里端州還在雙峽間
石室崧臺壓孤壘

清逸樓

南昌城中潘令宅清逸樓高二千尺斜飛四角河漢躔
密排萬瓦鴛鴦碧

環波亭

東湖入望晚波平蒲葉圓荷各自青不用更尋徐孺宅
編茅堵竹有碑亭

宋元詩會卷二十二

欽定四庫全書

宋元詩會卷二十三

兵部主事陳焯編

劉敞

字原父臨江新喻人舉慶厯進士廷試第一以編
排官玉堯臣親嫌改第二通判蔡州直集賢院判
尚書考功糾改夏竦謚及爭中貴人議樂時論題
之權度支判官徙三司使勸帝收攬威權以消天
變用同修起居注擢知制誥奉使朔方素習知山
川道徑每指點致譯者駭服又能辨彼中異獸朔
人敬之如神使還求知揚州多善政嘉祐大裕羣
臣議上尊號敞奏止之拜翰林侍讀學士侍英宗

講讀每用孝友規上上疎聽改容皇太后聞之亦
大喜病眩醫予告少間求外得汝州旋改集賢院
學士判南京御史臺辛年五十敵學問淵博朝廷
每有禮樂之事必就取決焉尤長于春秋為書四

卷十

雜詩效玉川體

三首

毀巢鳳不至竭澤龍不游賢者有所歸得非龍鳳儔周
公下白屋聖德被九州趙禹謝賓客漢朝以為憂澆淳
不相襲用舍何其繆苟循一身利不為萬姓謀哀彼朴
杜詩死生遺道周

鑿井取泉飲上山採薇食豈不信憔悴所願竭我力泉
也非難致薇也不易得志士恥徒飽衆人苟所獲犧牲
畏芻豢樊籠害羽翼晤理宜在蚤無為晚更惑

道薄德亦散功名為時須用力世所賢守正衆云愚智
者競蒿目小人復邇圖悠悠三季後此風益已渝安知
治未病舐痔而多車堯舜無能名越哉已矣夫

今古路

出門道路多縱橫不可測我今欲遠行須問曾行客徐

徐逢路人借問青松側客曰今何往答之遊京國客乃
指要路而言行有益古路雖大道不如今路直但行今
人路猶如假羽翼彼客別我去獨自躊躇立為見今古
路信乃無苦忒今路足輪蹄古路多荆棘欲行今人路
恐背古人跡欲行古人路今人笑迂僻又礙不出門奈
何寒饑逼哀哀此時路悠悠蒼天色不避今人嫌路須
行古陌古陌雖然遠且保無蹶失勉哉自勉哉前去難
之適不獲見楊朱萬古凝愁魄

小孤山

驚波觸南崖反怒射北壁蒼山與相排所謂小孤石蟠
根萬仞淵聳角千丈碧祠堂豁精嚴行旅進粉澤或云
婦女神盼蠻頗有迹吾知定名意似欲旌介特流俗失
其真傳聞莫開釋先王秩山川禮典有廟食奈何媚於
竈屈已忘正直吾欲為小孤作書解行客復恐不見從
嗟哉世多惑

示張直溫

築山必使高鑿井必使深百工戒淺近盛德羞浮沈馬
有尺寸枝能棲垂天禽馬有升斗泉能容橫江鱗借茲
諭物理足以開君心陋在容不足弱在力不任大道如
路然固無古與今

雜詩

齊有梁丘據晉有樂王鮒據能愛晏嬰鮒欲殘叔譽二
臣嬖兩朝事君為悅豫景有尚賢志據逆以為助平失
宥善心鮒乃速其去母以據為賢易地則同趣丈夫處

世間必有遇不遇
豈無覺者乎正色
居亦悟區區嬖幸
徒何忍就朋附

此詩別本
作劉攽

荒田行

大農棄田避征役
小農挈家就兵籍
良田茫茫少耕者
秋來雨止生荆棘
縣官募兵有著令
募兵如足官胥慶
從今無復官勸農
還逐魚鹽作亡命

漁翁

白頭老翁披敗蓑
求魚終日罩淮波
波波深水濶望不絕

網目雖繁能幾何大魚鱸鱖入淵底小魚鯢鯢登網裏
手輓足趼吁可憐何不為網大如天

過翟方進墓

持法雖深上不疑蕭疎何事觸刑機主恩未改天心改
使者空乘白馬歸

玉津園

垂楊冉冉籠清灤細草茸茸覆路沙長閑園門人不見
禁渠流出雨殘花

李斯墓

二世三公何足論憶牽黃犬出東門天心忌滿由來事
枉恃沙丘有舊恩

劉攽

字貢父敞弟也與兄同登科仕州縣二十年始為
國子監直講歐陽修薦試館職為中丞王陶所排
僅得校勘熙寧中判尚書考功同知太常禮院時
詔封太祖諸孫行尊者奉太祖後攽言禮諸侯不
得祖天子當自奉其國之祖宜崇德昭德芳之後
世世勿降爵使在宗廟祭祀之位即所以尊藝祖
也詔如其議考試開封舉人與同院王介爭署為
御史所劾罷禮院又詔王安石書論新法不便斥

判泰州稍遷京東轉運使黜監衡州哲宗初入為
祕書少監以疾求去蘇軾等奏留之不得加龍圖
閣知蔡州數月召拜中書舍人病弗能起卒年六
十七攷著書百卷尤邃史學為人疎偶喜諧謔數
召怨侮終不能改

齊魯

齊魯大儒師專門盛章句應物非已長何因責成務乃
其忠孝心足以事君父不如商利徒反道趨詭遇剝牀
已及膚泉貨山嶽聚賜金再百斤封邑成千戶若無天
事變豈不厚且固商鞅既誅夷桑羊亦刀鋸寄言縫衣

人施施幸安步

上書行

仕不至二千石賈不至五百萬此事夸者憂而非志士
歎君不見下邳少年受書起幄中運籌制千里功成不
受二萬戶拂衣歸從赤松子君不見計倪半策誅強吳
鷗夷扁舟浮五湖三致千金不自擅至今籍籍宗陶朱
大賢富貴不為己心事邈與常人殊逢時致身如反手
雲蒸龍變無時無君勿愛上書獻賦稱賢豪刺繡倚市

相矜高丈夫昔曾笑徒勞商賈旦旦爭錐刀

茂陵徐生歌

茂陵徐生老且迂一心區區長信書拜章北闕三待報
意欲霍氏安無虞那知世主心不同積惡未極難為功
徙薪曲突事不爾壯侯幾人當受封高岸為谷丘淵移
魯酒之薄邯鄲園人生快已各以時舊意望君君不思

熙州行

帝家將軍勇無敵謀如轉圜心匪席精誠動天天不隔

鑿空借籌皆碩畫賈生屬國試五餌買臣邊方發十策
偏師倏然盡西海一月三捷猶餘力百蠻解刀慕禮樂
五砮掃地開城壁蔥嶺陂陀蒲類深回笑秦并與禹績
尚書論功易等差御史行封自明白武功貤爵十萬金
徹侯印組丈二尺奮行過望理自爾少從進熟來無極
憶昔漢武開西域天下騷然苦征役哀痛輪臺置肥美
割棄造陽損斗僻豈知洮河宜種稻此去涼州皆白麥
女桑被野水泉甘吳兒力耕秦婦織行子雖為萬里程

居人坐盈九年食熙州歡娛軍事息天王聖明丞相直

過淳于髡墓

微言動相國大笑絕冠纓流轉有餘智滑稽全姓名師
儒空稷下衡蓋盡南荆贅壻不為辱旅墳知客卿

金陵懷古次韻

虎踞羣山帶遶江為誰興國為誰降高臺麋鹿有無數
廢苑鳬鷺去自雙萬事朝雲隨逝水百年西日照虛牕
白門酒美東風快笑數英雄盡一缸

和王正仲熙寧郊祀二十韻

駿命膺長發鴻圖本慎徽八方星拱極四海日升暉舊
典增咸秩彌文示表微聖時均玉燭天統正璿璣南極
迎陽復陰泉候氣歸積高常眷顧昭孝每無違羽衛來
雙闕和鑾竝六飛風霆齊命令龍虎會旌旂帳殿層城
暮金波列宿稀嚴更虛夜鑿雕輦下彤闈廣樂千人唱
升烟萬目睇衆神知受記象物競來依陟降兼明察圓
方比範圉送音仍嚮嚮昇福想霏霏霈澤蘇羣動春陽

暢瑾康慶深周揭厲感極至
獻歛多士參鳴玉微生廁
皂衣肅雍瞻帝武奉引近
天威儒館鵷鷺舊長謠錦
繡輝因知子雲賦何足頌
巍巍

春草

春草綿綿未有名水邊原上亂抽縈
似嫌車馬繁華地纔入城門便不生

詠史

自古邊功緣底事多因嬖倖欲封侯
不如直與黃金印

借取沙場白髑髏

寄王荊公

青苗助役兩妨農天下嗷嗷怨相公
惟有蝗蟲知感德却隨車騎過江東

出判泰州題館壁

壁門金闕倚天開五見宮花落井槐
明日扁舟滄海去却從雲氣望蓬萊

黃庭堅_上

字醫直洪州分寧人幼警悟其舅李常取庭堅傑
上書問之無不通驚為一日千里舉進士調葉縣
尉教授北京國子監留守文彥博才之蘇軾見其
文以為獨立物表由是聲名始振哲宗立召為校
書郎檢討神宗實錄遷著作佐郎擢起居舍人丁
母憂哀毀得疾幾殆服除為祕書丞紹聖初出知
宣州改鄆州章惇蔡卞與其黨論實錄多誣俾前
史官分居畿邑以待問摘既而院史考閱悉有據
依庭堅逢有問則直詞以對聞者壯之貶涪州別
駕改黔州再移戎州庭堅恬不介意蜀士從之遊
講學不倦徽宗立起知舒州以吏部員外郎召辭
不行丐貶得太平州尋為執政趙挺之所構羈管
宜州徙永州未聞命而卒年六十一初遊潯
皖山谷寺石牛洞樂之因自號山谷道人云

按田

河水積崢嶸山雪晴索冥幽齋怯寒威況復出城郭馬
為蝟毛縮人歎狐裘薄淤泥虎跡交叢社烏聲樂橋經
野燒斷崖值天風落洩雲迷鴻濛戴石瘦犂畝攀緣若
登天扶服如入索窮幽至河麋落日更盤礴新民數十
家飄寓初棲託壯產無情農荒榛盡開鑿臨流遣官丁
悉使呼老弱恩言諭官意鄣水陂可作春秧百頃杭秋
報千倉獲掉頭笑應儂吾麥自不惡麥苗不為稻誠恐
非民瘼不知肉食者何必苦改作我行疲鞍馬且用休

羈絡艱難相顧歎共道折腰錯勢窮不得已來自取束
縛月明夜蕭蕭解衣寬帶索卧看雲行天北斗挂屋角
析薪爨酒鼎興至且相酌

發舒州向皖口道中作寄李德叟

黑雲平屋簷晨夜隔星月曉裝商旅前冰底泥活活野
人攘畔耕蹇馬不能滑駝裘惜蒙茸俱落水塘缺孤村

小蝸舍乞火乾履襪前登極崢嶸

一作高寒

他日飛鳥沒寒

花委亂草耐凍鳴風葉江形篆平沙分派回勁筆髯弟

不俱來得句漫剗

一作漫得
司奇崛

却望同安城唯有松鬱

鬱遙知浦口晴諸峰見明雪

庚寅乙未舟泊大雷口

廣原嗥終風發怒土囊口萬艘萍無根迺知積水厚龍
鱗火熒熒鞭笞雷霆走公私連檣休森如束春韭倚筇
蒹葭灣垂楊欲生肘雄文酬江山惜無韓與柳五言叩
吟內慚愧陶謝手送菜煩鄰船買魚熟溪友兒童報晦
冥正晝見箕斗吾方廢書眠鼻鼾購囊吼猶防盜窺家

嚴鼓申夜守冶城謝公墩牛渚蕩子婦何時快登臨
師分牛酒

乙未移舟出口

畏風濤復入遂宿馬同行有劉三班善射沙夾遇盜劉手殺三人

江湖吞天胸蛟龍垂涎口養軀無千金特為親故厚本
心非華軒而與馬爭走聘婦緝落毛教免耨蔥韭衣食
端須幾將老猶掣肘安能詭隨人曲折作杞柳桓公甕
盎瘳楚國不龜手生涯但如此那問託婚友久陰快夜
晴天文若科斗村南鬼火寒村北風虎吼野人驅鷄豚

縛落堅纏守劉郎弓石八猛氣壓馮婦一試金僕姑歸
飲輭臂酒

曉放汴舟

秋聲滿山河行李在梁宋川塗事鷄鳴身亦逐羣動霜
清魚下流橘柚入包貢又持三十口去作江南夢

奉和文潛贈無咎

四首

龜以靈故焦雉以文故翳本心如日月利欲食之既後
生玩華藻照影終沒世安得八紘置以道獵衆智

北寺鎖齋房陳鏰時一啓晁張楚然來連壁照書几庭
栢鬱蔥蔥紅榴罇多子時蒙吐佳句幽處萬籟起

荆公六藝學妙處端不朽諸生用其短頗復鑿戶牖譬
如學捧心初不悟已醜玉石恐俱焚公為區別不

吾友陳師道抱獨門掃軌晁張作薦書射雉用一矢吾
聞舉逸民故得天下喜兩公陣堂堂此士可摩壘

子瞻詩句妙一世乃云效庭堅體蓋退之戲效孟
郊樊宗師之比以文滑稽耳恐後生不解故以

韻道之

我詩如曹鄴淺陋不成邦公如大國楚吞五湖三江赤
壁風月笛玉堂雲霧牕句法提一律堅城受我降枯松
倒澗壑波濤所舂撞萬牛挽不前公乃獨力扛諸人方
嗤點渠非鼎張雙但懷相識察牀下拜老龐小兒未可
知客或許敦龐誠堪壻阿巽買紅纒酒缸

顓上食蓮有感

蓮實大如指分甘念母慈其房頭觶觶更深兄弟思實

中有么荷拳如小兒手令我憶衆雛迎門索梨棗蓮心
政自苦食苦何能甘甘餐恐腊毒素食則懷慙蓮生淤
泥中不與泥同調食蓮誰不甘知味良獨少吾家雙井
塘十里秋風香安得同裘子歸製芙蓉裳

次韻子瞻送顧子敦按河北

今代顧虎頭骨相自雄偉不令長天官亦合丞御史能
貧安四壁無愠可三已昨來立清班國士相顧喜何因
將使節風日按千里汲黯不居中似非朝廷美大任錄

萬事御坐留諫紙發政恐傷民天步薄冰履蒼生憂其
魚南畝多被水公行圖安集信目勿信耳

次韻答秦少章乞酒

觀

朝事鞍馬蚤吏曹文墨拘初無尺寸補但於朋友疎豈
知簞瓢子卧起一牀書炙背道堯舜雪屋相與娛步出
城東門野鳥吟廢墟頗知富貴事勢窮心亦舒詩來獻
窮狀水餅嚼冰蔬斗酒得醉否枵腹如瓠壺亦可召西
舍侯嬴非博徒

贈秦少儀觀

汝南許文休馬磨自衣食但聞彪功曹滿世名籍籍渠
命有顯晦非人作通塞秦氏多英俊少游眉最白頗聞
鴻雁行筆皆萬人敵吾蚤知有覲而不知有覲少儀袖
詩來剖蚌珠的皪乃能持一鏃與我箭鋒直自吾得此
詩三日卧向壁挽來不能寸推去輒數尺才難不其然
有亦未易識

次韻謝斌老送墨竹十二韻

古今作生竹能者未十輩吳生勒枝葉筌窠遠不逮江
南鐵鉤鎖最許誠縣會燕公灑墨成落落與時背譬如
剗心松中有歲寒在湖州三百年筆與前哲配規摹轉
銀鈎幽賞非俗愛披圖風雨入咫尺莽蒼外吾子學湖
州師逸功已倍有來竹四幅冬夏生變態預知更入神
後出遂無對吾詩被壓倒物固不兩大

跋子瞻和陶詩

子瞻謫嶺南時宰欲殺之飽喫惠州飯細和淵明詩彭

澤千載人東坡百世士出處雖不同風味乃相似

次韻答斌老病起獨遊東園

主人心安樂花竹有和氣時從物外賞自益酒中味
斲枯蟻改穴掃籜筍迸地萬籟寂中生乃見風雨至

顏徒貧樂

二首

衡門低首過環堵容膝坐四傍無給侍百衲自纏裹
論事直如絃觀書曲肱卧饑來或乞食有道無不可

小山作友朋義重子輿桑香草當姬妾不須珠翠妝鳥

烏窺凍硯星月入幽房
兒報無炊米浩歌繞屋梁

以椰子茶餅寄德孺

炎丘椰木實入用
隨茗椀譬如楛石斲
但貴從來遠
往時萬里物
今在籬落間
知君一拂拭
想我瘴霧顏

同宋景瞻分題汴上行

東風何時來堤柳芳且柔
河冰日已銷漫漫春水流
寒梅未破萼芳草綠猶稠
歲月不我還念此人生浮
高車無完輪積水有覆舟
鹿門不返者誰得從之遊

林為之送筆戲贈

閻生作三副規摹宣城葛外貌雖銑澤毫心或粗糲巧
將希栗尾拙迺成棗核李慶縛散卓含墨能不洩病在
惜白毫往往半巧拙小字亦周旋大字難曲折時時一
毛亂迺似逆梳髮張鼎徒有表徐偃元無骨模畫記姓
名亦可應倉卒為之街南居時通鈴下謁晴軒坐風涼
怪我把枯筆開囊撲蠹魚遣奴送一束洗硯磨松煤揮
灑至日沒蚤年學屠龍適用固疎濶廣文困蘊鹽烹茶

對秋月略無人問字況有客投轄文章寄呻吟講授費
頰舌間無用心處雌黃到筆墨時不與人遊孔子尚愛
日作詩當鳴鼓聊自攻短闕

過家

絡緯聲轉急田車寒不運兒時手種柳上與雲霧近舍
傍舊傭保少換老欲盡宰木鬱蒼蒼田園變畦畛招延
屈父黨勞問走婚親歸來翻作客顧影良自哂一生萍
託水萬事雪侵鬢夜闌風隕霜乾葉落成陣燈花何故

喜大是報書信親年當喜懼兒齒欲毀齒繫船三百里
去夢無一寸

過致政屯田劉公隱廬

兒時拜公牀眼碧眉紫烟舍前架茅茨爐香坐僧禪女
奴煮粟石盆瀉機泉今來掃門巷竹間翁蛻蟬堂堂
列五老勝氣失江山石盆爛黃土茅齋薪壞椽女奴為
民妻又瘞蒿里園當年笑語地華屋轉朱欄課兒種松
子傘蓋上參天投策數去日木行天再環先生古人風

鐵膽石肺肝眼前不可意壯日挂其冠解衣廬君峰洗
耳瀑布源霧豹藏文章驚世時一斑衆人初易之久遠
乃見難憶昔子政在為翁數解顏五兵森武庫河漢落
古端王陽已富貴塵冠不肯彈呻吟刊十史凡例墨新
乾宰木忽拱把相望風隧寒百楹書萬卷少子似翁賢
次韻子瞻題郭熙畫秋山

黃州逐客未賜環江南江北飽看山玉堂卧對郭熙畫
發興已在青林間郭熙官畫但荒遠短紙曲折開秋晚

江村烟外雨脚明歸雁行邊餘疊巘坐思黃柑洞庭霜
恨身不如雁隨陽熙今頭白有眼力尚能弄筆映牕光
畫取江南好風日慰此將老鏡中髮但熙肯畫寬作程
五日十日一水石

次韻子瞻和子由觀韓幹馬因論伯時畫天馬

子闌花驄龍八尺看雲不受絡頭絲西河驄作葡萄錦
雙瞳夾鏡耳卓錫長楸落日試天步知有四極無由馳
電行山立氣深穩可耐珠韉白玉羈李侯一顧歎絕足

領略古法生新奇一日真龍入圖畫在垆羣雄望風雌
曹霸弟子沙苑丞喜作肥馬人笑之李侯論幹獨不爾
妙畫骨相遺毛皮翰林評書乃如此賤肥貴瘦渠未知
況我平生賞神駿僧中云是道林師

常父答詩有煎點徑須煩綠珠之句次韻戲答

小鬟雖醜巧妝梳掃地如鏡能檢書欲買娉婷供煮茗
我無一斛明月珠知公家亦闕掃除但有文君對相如
政當為公乞如願作牋遠寄宮亭湖

戲呈孔毅父

平仲

管城子無食肉相孔方兄有絕交書文章功用不經世
何異絲窠綴露珠校書著作頻詔除猶能上車問何如
忽憶僧牀同野飯夢隨秋雁到東湖

以團茶洮州綠石研贈無咎文潛

晁子智囊可以括四海張子筆端可以回萬牛自我得
二士意氣傾九州道山延閣委竹帛清都太微望冕旒
貝宮胎寒弄明月天網下罩一日收此地要須無不有

紫皇訪問富春秋是無咎贈君越侯所貢蒼玉璧可烹
玉塵試春色澆君胷中過秦論斟酌古今來活國張文
潛贈君洮州綠石含風漪能淬筆鋒利如錐請書元祐
開皇極第八思齊訪落詩

謝送礪賜壑源揀芽

喬雲從龍小蒼壁元豐至今人未識壑源包貢第一春
緗廬礪香供玉食睿思殿東金井欄甘露薦椀天開顏
橋山事嚴庀百局補袞諸公省中宿中人傳賜夜未央

雨露恩光照宮燭左丞似是李元禮好事風流有涇渭
宵憐天祿校書郎親敕家庭遣分似春風飽識大官羊
不慣腐儒湯餅腸撥攪十年燈火讀令我胸中書傳香
已戒應門老馬走客來問字莫載酒

聽宋宗儒摘阮歌

翰林尚書宋公子文采風流今尚爾自疑耆域是前身
囊中探丸起人一作九死貌如千歲枯松枝落魄酒中無
定止得錢百萬送酒家一笑不問今餘幾手揮阮咸送

飛鴻促絃聒醉驚客起寒蟲催織月籠秋獨雁叫羣天
拍水楚國羈臣放十年漢宮佳人嫁千里深閨洞房語
恩怨紫燕黃鸝韻桃李楚狂行歌驚市人漁父擘舟在
葭葦問君枯木著朱繩何能道人意中事君言此物傳
數姓玄璧庚庚有橫理閉門三月傳國工身今親見阮
仲容我有江南一丘壑安得與君醉其中曲肱聽君寫
松風

答黃冕仲索煎雙井并簡揚休

江夏無雙乃吾宗同舍頗似王安豐能澆茗椀瀹我
風袂欲挹浮丘翁吾宗落筆賞幽事秋月下照澄江空
家山鷹爪是小茶敢與好賜雲龍同不嫌水厄辛來辱
寒泉湯鼎聽松風夜堂朱墨小燈籠惜無纖纖來捧椀
唯倚新詩可傳本

出城送客過故人東平侯趙景珍墓

令瑒

朱顏苦

一作欲

留不肯住白髮政爾欺得人嬋娟去作誰

家妾意氣都成一聚塵今日牛羊上丘壟當時近前左

右嗔花開鳥啼荆棘裏誰與平章作好春

王充道送水仙花五十枝欣然會心為之作詠

凌波仙子生塵襪水上輕盈步微月是誰招此斷腸魂
種作寒花寄愁絕含香體素欲傾城山礬是弟梅是兄
坐對真成被花惱出門一笑大江橫

武昌松風閣

依山築閣見平川夜闌箕斗插屋椽我來名之意適然
老松魁梧數百年斧斤所赦今參天風鳴媧皇五十絃

洗耳不須菩薩泉嘉二三子甚好賢力貧買酒醉此筵
夜雨鳴廊到曉縣相看不歸卧僧檀泉枯石燥復潺湲
山川光輝為我妍野僧蚤饑不能飧曉見寒谿有炊烟
東坡道人已沈泉張侯何時到眼前釣臺驚濤可晝眠
怡亭看篆蛟龍纏安得此身脫拘攣舟載諸友長周旋
書磨崖碑後

春風吹船著浯溪扶藜上讀中興碑平生半世看墨本
摩挲石刻鬢成絲明皇不作苞桑計顛倒四海由祿兒

九廟不守乘輿西萬官已作烏擇棲撫軍監國太子事
何乃趣取大物為事有至難天幸爾上皇跼蹐還京師
內間張后色可否外間李父頤指揮南內淒涼幾苟活
高將軍去事尤危臣結春陵二三策臣甫杜鵑再拜詩
安知忠臣痛至骨世上但賞瓊琚詞同來野僧六七輩
亦有文士相追隨斷崖蒼蘚對立久凍雨為洗前朝悲

送王郎

酌君以蒲城桑落之酒泛君以湘纍秋菊之英贈君以

黔川點漆之墨送君以陽關墮淚之聲酒澆胸中之磊
塊菊制短世之頽齡墨以傳千古文章之印歌以寫一
家兄弟之情江山萬里頭俱白骨肉十年眼終青連牀
夜語鷄戒曉書囊無底談未了有功翰墨乃如此何恨
遠別音書少炒沙作糜終不飽鏤冰文章費工巧須要
心地收汗馬孔孟行世日杲杲有弟有弟力持家婦能
養姑供珍鮭兒大詩書女絲麻公但讀書煮春茶

伯時彭蠡春牧圖

岳陽樓上春已歸湖中鴻雁拍波飛布帆天濶隨鳥道
石林風晚吹人衣春水初生及馬腹浮灘欲上西山麓
遙看絕嶺秀雲松上有垂蘿暗溪谷沙眠草啗性不驕
側身注目鳴相招林間瞥過星爍爍原上獨立風蕭蕭
君不見中原真種邊塵沒南行市骨何倉卒祇收力健
載征夫肯向時危辨奇骨即今貢馬西北來東西坊監
屯雲開紛然駑驥同一秣爾可不憂四蹄脫

戲贈彥深

李原字彥深厚
之弟居南陽

李髯家徒立四壁未嘗一飯能留客春寒茅屋交相風
倚牆捫蝨讀書策老妻甘貧能養姑寧剪髮鬻不典書
大兒得餐不索魚小兒得袴不索襦庾郎鮭菜二十七
太常齋日三百餘上下分牖一飽飯藏神夢訴羊蹴蔬
世傳寒士有食籍一生當飯百甕道冥冥主張審如此
附郭小圃宜勤鋤蔥秧青青葵甲綠蚤韭晚菘羹糲熟
充虛解戰賴湯餅芼以萍齏與甘菊幾日憐槐已著花
一心呪筍莫成竹羣兒笑髯窮百巧我謂勝人飯重肉

羣兒笑髯不若人我獨愛髯無事貧君不見猛虎即人
厭麋鹿人還寢皮食其肉濡需終與豕俱焦飫肥擇甘
果非福蟲蟻無知不足驚橫目之民萬物靈請食熊蹯
楚千乘立死山壁漢公卿李髯作人有佳處李髯作詩
有佳句雖無厚祿故人書門外猶多長者車我讀揚雄
逐貧賦斯人用意未全疎

和謝公定征南謠

傳聞交州初陸梁東連五溪西氏羌軍行不斷蠻標質

謀主皆收漢畔亡合浦譙門腥血沸晉興城下白骨荒
謀臣異時坐致寇守臣今日愧苞桑已遣戈船下灘水
更分樓船浮豫章頗聞師出三鷁路盡是中屯六郡良
漢南食麥如食玉湖南驅人如驅羊營平請穀三百萬
祁連引兵九千里少府私錢不可知大農計歲今餘幾
土兵番馬貌虎同蝮蛇毒草篁竹中未論芻粟捐金費
直愁瘴癘連營空我思荊州李太守欲募蠻丁令自攻
至今民歌尹殺我州髡擇人誠見功張喬祝良不難得

誰借前筋開天聰詔書哀痛言語切為民一洗橫尸血
摧鋒陷堅賞萬戶塹山堙谷窮三穴南平舊時頗臣順
欲獻封疆請旌節廟謀猶計病中原豈知一朝更屠滅
天道從來不爭勝功臣好為可喜說交州雞肋安足貪
漢開九郡勞臣監呂嘉不肖佩銀印徵側持戈敵百男
君不見往年瀕海未罷縣趙地閉關罷朝獻老翁竊帝
聊自娛白頭抱孫思事漢孝文親遣勞苦書稽首請去
黃屋車得一亡十終不忍太宗之仁千古無

次韻子瞻春菜

北方春蔬嚼冰雪妍暝思采南山蕨
韭苗水餅姑置之
苦菜黃鷄羹糝滑蓴絲色紫菰苻白
蔞蒿牙甜痺頭辣
生蘆入湯翻手成芼以薑橙誇縷抹
驚雷菌子出萬釘
白鵝截掌鼈解甲琅玕林深未飄籜
輒炊香秔煨短茁
萬錢自是宰相事一飯且從吾黨說
公如端為苦筍歸
明日青衫誠可脫

彫陂

彫陂之水清且泚屈為印文三百里呼船載過七十餘
褰裳亂流初不記竹輿嘔啞山徑涼僕姑呼婦聲相倚
簞中猶道泥滑滑僕夫慘慘耕夫喜窮山為吏如漫郎
安能為人作嚆矢老僧迎謁喜我來吾以王事篤行李
知民虛實應縣官我寧信目不信耳僧言生長八十餘
縣令未曾身到此

長句謝陳適用惠送吳南雄所贈紙

廬陵政事無金牛恐是漢時陳太丘書記姓名不肖學

得紙無異夏得裘
琢詩包紙送贈我
自狀明月非暗投
詩句縱橫剪宮錦
惜無阿買書銀鈎
蠻溪切藤卷盈百
側豎羞滑繭羞白
想當鳴杵砧面平
枕榔葉風溪水碧
千里鵝毛意不輕
瘴衣腥膩北歸客
君侯謙虛不自供
胡不贈世文章伯
一涔之水容牛蹄
識字有數我自知
小時雙鉤學楷法
至今兒子憎家鷄
雖然嘉惠敢虛辱
煮泥續尾成大軸
寫心與君心莫傳
平生落魄不問天
樽前花底幸好戲
為君絕筆謝風烟
已無商頌倚那手

請續南華內外篇

和曹子方雜言

正月尾垂雲如覆孟雁作斜行書三十六陂浸烟水想
對西江彭蠡湖人言春色濃如酒不見揀秧吳女手冷
卿小塢頗藏春張侯官居柳對門當風橫笛留三弄燒
燭圍棋覆九軍盡是向來行樂事每見琵琶憶朝雲只
今不舉蛾眉酒紅牙捍撥網蛛塵曹侯來書承太僕試
說相馬猶可人照夜白真乘黃萬馬同秣隨低昂一矢

射落早雕雙張侯猶思在戎行橫山虎北開漢疆冷卿
智多髮蒼浪牛刀發硯思一邦政成十綴舞紅妝兩侯
不如曹子方朶頤論詩蝟毛張龜藏六用中有光何時
端能俱過我掃除北寺讀書堂菊苗煮餅深注湯更碾
盤龍不入香

奉謝劉景文送團茶

劉侯惠我大玄壁上有雌雄雙鳳跡鵝溪水練落春雪
栗面一杯增目力劉侯惠我小玄壁自裁半壁煮瓊糜

收藏殘月惜未碾直待阿衡來說詩絳囊團團餘幾璧
因來送我公莫惜箇中渴羌飽湯餅鷄蘇胡麻煮同喫
謝景文惠浩然所作廷珪墨

廷珪麝墨出蘇家麝煤添澤紋烏韉柳枝瘦龍印香字
十襲一日三摩挲劉侯愛我如桃李揮贈要我書萬紙
不意神禹治水圭忽然入我懷袖裏吾不能手抄五車
書亦不能寫論付官奴便當閉門學水墨灑作江南驟
雨圖

阻水泊舟竹山下

竹山蟲鳥朋友語討論陰晴怕風雨
丁寧相教防禍機
草動塵驚忽飛去提壺歸去意甚真
柳暗花濃亦半春
北風幾日銅官縣欲過五松無主人

和舍弟中秋月

高秋搖落四十五清都蚤霜凋桂叢
纖塵不隔四維淨
寒光獨照萬象中少年氣與節物競
詩豪酒聖難爭鋒
桓伊老驥思千里尚能三弄當清風
廣文陋儒嬾於事

浩歌不眠倚梧桐百憂生火作內熱何時心與此月同
後生晚出不勉學從漢至今無揚雄天馬權奇大宛種
吾家阿熊風骨聳言詩已出靈運前行身未聞孟軻勇
明牕文字不取讀蜘蛛結網塵堆壅少壯幾時夏已秋
待而成人吾木拱憐汝起予秋月篇我衰安得筆如椽
但使樽中常有酒不辭座上更無羶把詩問字為汝說
便當侯家歌舞筵

韓信

為黃幾復作

韓生高才跨一世劉項存亡翻手耳終然不忍負沛公
頗似從容得天意成皋日夜望救兵取齊自重身已輕
躡足封王能蚤寤豈恨淮陰食千戶雖知天下有所歸
獨憐身與噲等齊蒯通狂說不足撼陳稀孺子胡能為
予嘗貫酒淮陰市韓信廟前木十圍千年事與浮雲去
想見留侯決是非丈夫出身佐明主用舍行藏可自知
功名邂逅軒天地萬事當觀失意時

以右軍書數種贈丘十四

丘郎氣如春景晴風暄百果草木生眼如霜鵲齒玉冰
擁書環坐愛牕明松花泛硯摹真行字身藏穎秀勁清
問誰學之果蘭亭我昔頗復戲墨卿銀鈎蠅尾爛箱籬
贈君鋪案黏曲屏小字莫作癡凍蠅樂毅論勝遺教經
大字無過瘞鶴銘官奴作草欺伯英隨人作計終後人
自成一家始逼真卿家小女名阿潛睂目似翁有精神
試留此書他日學往往不減衛夫人



宋元詩會卷二十三